

Incumbensa Horrer concernent l'auzament dals supplements per uffants

Il Grischun è confruntà cun grondas sfidas demograficas. Dal pli nov scenari da referenza da l'Uffizi federal da statistica per la perioda da 2020 fin 2050 resulta, che la populaziun dal chantun Grischun vegnia a sa reducir per 3,5 pertschient fin l'onn 2050. In svilup demografic negativ vegn prognostitgà mo per il chantun Grischun ed il chantun Tessin.

En l'avegnir vegn il dumber d'abitantas ed abitants dal chantun Grischun a sa sbassar, entant che la populaziun daventa en media pli e pli veglia. Quest svilup chaschuna gronds problems per la societad sco er per l'economia publica dal Grischun. Durant ils ultims decennis èn er ils custs da viver per famiglias s'augmentads cuntinuadamain, en spezial ils custs d'abitar e las premias da las cassas da malsauns.

Sut quest aspect èsi inditgà, ch'il Grischun investeschia pli fitg en las famiglias. Mo sch'il chantun è attractiv per famiglias e rinforza lur capaciad da cumpra, impedescha el l'emigraziun e stgaffescha perspectives per regiuns, nua che l'economia publica po prosperar.

Ina mesira per rinforzar las famiglias è d'auzar ils supplements per uffants. En il chantun Grischun importan ils supplements per uffants ed ils supplements da scolaziun oz minimalmain 220 francs respectivamain minimalmain 270 francs (art. 4 al. 2 da la Lescha davart ils supplements da famiglia [LSF; DG 548.100]). Ils ultims onns n'èn ils supplements per uffants mai vegnids auzads substanzialmain; ina cumpensaziun sistematica da la chareschia n'hai betg dà.

En la cumparegliaziun interchantunala occupa il chantun Grischun mo ina piazza media, entant che per exempel il chantun Vallais paja supplements per uffants e da scolaziun en l'autezza da 327 francs respectivamain 477 francs.

La Regenza vegn incumbensada da suttametter al Cussegl grond ina missiva per auzar ils supplements per uffants ed ils supplements da scolaziun sin minimalmain 325 francs respectivamain 475 francs. La finanziaziun duai vegnir garantida cun conceder meds da las finanzas publicas generalas, cun augmentar la tariffa da contribuziun tenor l'art. 13 da las Disposiziuns executivas tar la Lescha davart ils supplements da famiglia (DERtLSF; DG 548.120) u tras ina cumbinaziun da las duas mesiras.

Cuira, ils 22 d'october 2025

Horrer, Baselgia, Müller, Atanes, Bachmann, Biert, Bisculm Jörg, Bluvol, Cahenzli-Philipp, Candrian (Glion), Casale, Das, Gartmann-Albin, Gredig, Hoch, Kaiser, Kreiliger, Mächler, Mazzetta, Nicolay, Preisig, Rusch Nigg, Rutishauser, Schläpfer, Zaugg-Ettlin, Zindel